

Pol ndê bapia ñamata-nga têt lau Tesalonika-nga Yom whê bapia dindéc sa-nga

Tesalonika in malac atu dan nañ yêc gamen Masedonia-nga. Pol in ñgac ñamata-nga bu hoc ñawaê ñayham asê yêc Tesalonika (Apo 17:1-9). In mbo whin ñac bêc daêsam dom, ma lau Israel-nga nañ sêkên whin Yisu dom yêc malac dau, nañ sem lêmun in ma sêkên kisa in, dec in kôlhô gi. Magoc lau Tesalonika-nga nañ sic hu sêkên whin Pômdau, nañ sêsap si sêkên whin dôn ñanga, e ñawaê ñayham gi tiapa yêc gamen hon dinañ (1:8).

Tinambu Pol gauc gêm ñac ñapan ma kêkin Timoti bu mbo whin ñac ma êndôhôn ñac, ma bu lic ñac sêmbo ñalên bocke (3:1-5). Ma Timoti mbu têt Pol gi tiyham, ma gic min pi ñac si lêt ñayham (3:6-10). Ñawaê dau kôm Pol tac ñayham sambuc, dec in to bapia dindéc têt ñac.

Pol to yom ñatô têt lau Tesalonika-nga, bu puc ñac dôn bu sêsap mêtê ñayham dôn ma sêtimêtê dau ñapep. In whê lau batê si sêtisa ñalên sa têt ñac, bu nem malô ñac ma sêtan lau nañ sêmbac ndu su, nañ ênlêc dom. Ma in to yom pi mêtê ñayham-ñayham daêsam nañ gic lau sêkên whin-nga ñawaê.

Pol gic hu ndê bapia

¹ Aö Pol, ma Sailas lu Timoti, ato bapia dindec têtj gôlôwac dabuŋ malac Tesalonika-nga, mac lau naŋ akêŋ whiŋ Damaŋ Anötö lu Pômdau Yisu Kilisi. Pômdau ndê mwasin ti yom malô têtj mac hoŋ.

Pol tac ŋayham tu lau Tesalonika si mêtê-nga

² Tôm bêc hoŋ yac aten mbec, ma am danje Anötö tu mac hoŋ-nga. ³ Têm hoŋ yac aten mbec têtj Damaŋ Anötö, naŋ yac gauc gêm mac nem mêtê ŋayham. Mac akôm gwelen ŋayham tu mac nem akêŋ whiŋ-nga, ma akôm gêŋ daêsam bu anem akiŋ asidôwai, tu mac nem mêtê atac whiŋ lau-nga. Ma mac akêŋ batam bu Pômdau Yisu Kilisi oc mbu meŋ, dec mac alhac ŋaŋga eŋ. ⁴ O asidôwai naŋ Anötö tac whiŋ mac ndu andô. Yac aŋyalê su bu Anötö kêgalêm mac sa ati in ndê. ⁵ Ŋahu bu têtj ndoc yac ahoc ŋawaê ŋayham asê têtj mac, naŋ yom dau meŋ ŋambwa dom, magoc meŋ ti Anötö ndê ŋaclai. Ma Ŋalau Dabuŋ puŋ ŋawaê dau dôŋ sip nem ŋalôm, e mac akêŋ whiŋ ŋaŋga eŋ. Ma mac daôm aŋyalê mêtê naŋ yac akôm, bu anem mac sa têtj ndoc yac ambo awhiŋ mac.

⁶ Ŋawapac daêsam tap mac sa, magoc Ŋalau Dabuŋ puc mac dôŋ, dec akôc ŋawaê ŋayham sa ti atac ŋayham atu. Ŋalêŋ dinaŋ mac apuc yac mba waŋaŋ, ma apuc Pômdau ndê waŋga bocdinaŋ. ⁷ Mac nem lêŋ dinaŋ ti dôhôn ŋayham, bu lau sêkêŋ whiŋ-nga yêc gameŋ Masedonia ti Akaya-nga hoŋ sêlic ma sêŋkuc. ⁸ Ma mac nem lêŋ ŋayham kôm Pômdau ndê ŋawaê ŋayham tiapa yêc gameŋ Masedonia-nga

ma gameŋ Akaya-ŋga tawasê dom. Lau yêc gameŋ hoŋ sêŋgô ŋawaê bu mac akêŋ whiŋ Anötö. Bocdinaŋ gitôm dom bu yac asôm yom daŋ bu awhê mac nem lêŋ sa têtŋ lau. ⁹ Lau dau sic miŋ yom hoŋ pi mac nem lêŋ ŋayham. Sic miŋ bu mac akôc yac sa ŋalêŋ ŋayham, ma mac ahu anötöi gwam siŋ, ma anem daôm kwi bu anem akiŋ Anötö naŋ Anötö ŋandô, ma mbo tali ŋapaŋ. ¹⁰ Ma kwahic dec mac akêŋ Batam iŋ ndê Atu Yisu bu mbu akêŋ undambê meŋ. Iŋ Yisu naŋ Anötö uŋ iŋ sa akêŋ lau batê-ŋga. Yisu dau dinaŋ dec kêgaho yac su yêc Anötö ndê atac ŋandê, naŋ oc meŋ sa tiawê têtŋ bêc ŋambu-ŋga.

2

Pol ndê gwelen yêc Tesalonika

¹ O asidôwai, mac aŋyalê bu yac ac mac kêsi ŋambwa dom, magoc gwelen naŋ akôm têtŋ mac, naŋ ŋandô sa su. ² Mac aŋgô su bu têtŋ ndoc yac ambo malac Pilipai, naŋ lau sêpu ti sêkôm yac ŋayom daêsam. Ma têtŋ ndoc yac ahôc asê mac nem malac Tesalonika, naŋ lau sêkêŋ kisa yac ŋaŋga bocdinaŋ. Magoc Anötö puc yac dôŋ, dec alhac ŋaŋga ma ahoc iŋ ndê ŋawaê ŋayham asê têtŋ mac. ³ Yac alhac ŋaŋga ma akac mac bu akêŋ whiŋ Yisu, ŋahu bu yac aŋyalê bu yom naŋ yac ahoc asê, naŋ yom tasanŋ dom, ma yac amenŋ ambo awhiŋ mac tu bu akôm mêtê sac me aŋsau mac-ŋga dom. ⁴ Mba! Yac aŋyalê bu Anötö gêlic yac atôm solop, dec kêŋ ŋawaê ŋayham sip yac amanŋ. Ma bocdinaŋ yac ahoc ŋawaê ŋayham asê tu bu lau sêlic yac ŋayham-ŋga dom. Mba!

Yac akôm tu bu Anötö, nañ kêyalê yac neñ ñalôm e pi sa, nañ lic ñayham. ⁵ Mac anyalê bu yac ambac yom mac dom. Ma Anötö dau kêyalê bu yom tanğatu gêñ-nga dañ siñ dau yêc yac mba ñalôm dom. ⁶ Ma yac akôm tu bu mac me lau ñatô sêtoc yac mba waêñ sa-nga dom.

⁷ Kilisi dau kêyalıñ yac sa ati †aposel, ma tu dinañ-nga dec gitôm bu yac oc tanğwê mac bu akêñ gêñ tu anem yac sa-nga. Tigeñ yac atec bu akêñ ñawapac têt mac, dec andac mac bu akêñ gêñ dañ têt yac dom. Yac ambo awhiñ mac ti akôm gêñ malô, gitôm dinda dañ yob iñ ndê balêkoc. ⁸ Yac atac ñayham atu bu ahoc Anötö ndê ñawaê ñayham asê têt mac. Magoc yac akêñ gêñ tigeñ dinañ dom. Yac alic ñayham bu akêñ dauñ sambuc tu mac-nga bocdinañ. Nahu bu yac atac whiñ mac ndu andô. ⁹ O asidôwai, gauc nem gwelen nañ yac akôm yêc mac nem gameñ. Yac ambo awhiñ mac bu ahoc Anötö ndê ñawaê ñayham asê, magoc tôm ac ti ôbwêc yac akôm gwelen atu whiñ, bu akôm kwan dauñ-nga. Yac atec bu akêñ ñawapac têt mac, ma tu dinañ-nga dec yac akôm gwelen dinañ.

¹⁰ Mac lau nañ akêñ whiñ Yisu alic yac mba mêtê hoñ nañ akôm têt ndoc yac ambo awhiñ mac, ma anyalê bu yac akôm gêñ so dañ dom. Yac akôm mêtê gitêt ti dabuñ eñ. Ma Anötö kêyalê yac mba mêtê hoñ whiñ. ¹¹ Mac anyalê bu yac akôm mêtê ñayham têt mac hoñ, gitôm damba dañ kôm têt iñ ndê balêkoc. ¹² Yac am malô mac, ma añgilí mac ti ac yomsu mac bu añsêlêñ ti asa nem lêt atôm Anötö ndê lau dabuñ

solop. Bu in kégalêm mac sa bu asôc in ndê †gôlinj n̄apu, ma bu atap in ndê n̄awasi atu sa.

Lau Tesalonika-n̄ga sêhôn n̄awapac magoc sêlhac n̄an̄ga

¹³ Ma yac am dan̄ge Anötö tôm bêc hon, bu têtj ndoc mac an̄gô in ndê yom yêc yac, nan mac akôc sa gitôm n̄amalac si yom n̄ambwa dom. Mba! Mac an̄yalê n̄apep bu Anötö ndê yom solop, ma bocdinan̄ dec mac akôc sa. Ma kwahic dec yac an̄yalê bu yom dau kôm gwelen̄ yêc mac nem n̄alôm. ¹⁴ Nahu bu mac daôm nem lau nan sêkênj whinj dom, nan sêkênj n̄awapac daêsam têtj mac, magoc yac alic bu mac alhac n̄an̄ga. O asidôwai, n̄alênj dinan̄ mac an̄kuc Anötö ndê gôlôwac dabun̄ nan sêmbo gamen̄ Judia-n̄ga, nan si lêtj. Bu n̄ac dau si lau Israel-n̄ga sêkênj n̄awapac têtj n̄ac tu sêkênj whinj Yisu Kilisi-n̄ga. ¹⁵ An̄gô su nan! Mun-n̄ga lau Israel-n̄ga dau sic Anötö ndê lau propet ndu, ma n̄asawa lec n̄ac sic Pômdau Yisu ndu, ma sêsoc yac su yêc n̄ac si gamen̄. N̄ac si lêtj dinan̄ Anötö gêlic sac. Ma n̄ac sêkênj kisa lau yêc gamen̄ hon, ¹⁶ bu n̄ac sêkôm bu sêlhac yac mba gwelen̄ n̄awaê n̄ayham-n̄ga ahuc e yac atôm dom bu ahoc yom asê têtj †lau gamen̄ apa-n̄ga pi Anötö ndê lêtj nem n̄ac si-n̄ga. Bocdinan̄ sac nan n̄ac sêkôm, nan kêsôwec tiatu n̄apan̄, ma n̄ac sic waê bu sêtap Anötö ndê tac n̄andê atu sa.

Pol tac whinj bu lic lau Tesalonika-n̄ga tiyham

¹⁷ O asidôwai, lau nan sêkênj kisa yac, nan sêkac yac su ambo ahê mac n̄asawa apê lec. Yac an̄ônj mba, magoc yac gauc gêm mac n̄apan̄,

ma yac atac whiñ kêlêc bu alic mac tiyham. ¹⁸ Yac atac whiñ bu ambu aloc, ma aö Pol kasahê tidim daêsam bu waloc, tigenj Sadan kalhac yac ahuc. ¹⁹ O lauhac! Têñ ndoc Pômdau Yisu bu mbu meñ, nañ yac lau aposel oc akêñ batan gêñ sake? Ma gêñ sake oc kôm yac atisambuc? Ma ñaôli ñayham bocke oc po yac sa yêc Yisu anğô-ñga? Aö wasôm têt mac! Mac lau daôm dinan. ²⁰ Yomandô! Mac daôm ati yac mba waêñ ti atac ñayham ñahu.

3

Pol kêkinj Timoti têt malac Tesalonika gi

¹ Yac mba ñalôm kac yac ñandô bu alic mac. Magoc atap señ dan sa dom. Bocdinan yac alic ñayham bu ambo malac Atens, ² ma ankinj Timoti têt mac goloc. In yac neñ asidôwa dan, nañ kôm Anötö ndê gwelenj ma hoc Kilisi ndê ñawaê ñayham asê whiñ yac. Yac ankinj in têt mac goloc, bu puc mac dôn ma êñgilí mac bu asap nem akêñ whiñ dôn ñanğa. ³ Yac ahêgo daun bu mboe ñawapac nañ tap mac sa, nañ oc kôm mac nem lau ñatô sêhu si sêkêñ whiñ sinj. Magoc mac anjalê su, bu ñawapac kainj dinan gic waê yac lau dakêñ whiñ-ñga. ⁴ Gauc nem bu têt ndoc yac ambo awhiñ mac, nañ yac asôm asê têt mac tidim daêsam, bu kisa oc tap yac sa. Ma yac mba yom dinan, kwahic dec ñandô sa su. ⁵ Aö gahêgo daun bu mboe Sadan êntôm mac e gwelenj nañ yac akôm têt mac, nañ oc ñandô mba. Gauc dinan kôm aö ñalôm ñawapac ñapanj, dec kakinj

Timoti bu lic mac ma kêñ ñawaê têtñ aö bu mac asap nem lêtñ akêtñ whiñ-ñga dôn, me ahu siñ su.

Pol tac ñayham têtñ ndoc iñ ñgô Timoti ndê yom

⁶ Ma kwahic dec Timoti mbu meñ hóc asê aö, ma kêñ puc ñayham pi mac nem lêtñ akêtñ whiñ Pômdau ti atac whiñ lau-ñga. Ma iñ sôm bu mac gauc gêm yac ti atac ñayham ñapañ, ma atac whiñ bu alic yac tiyham, tôm yac atac whiñ bu alic mac tiyham bocdinañ. ⁷ O asidôwai. Yac dec ambo ti ahóc ñawapac daêsam, ma lau sêkêtñ kisa yac ñapañ. Tigen kwahic dec yac añgô bu mac akêtñ whiñ ñañga ambo, ma ñawaê dau puc yac dôn ma kôm yac ñalôm tigahô. ⁸ Kwahic dec yac añyalê bu mac asap Pômdau dôn ma ahu iñ siñ dom, dec ambo ti atac ñayham sambuc.

Pol teñ mbec tu lau Tesalonika-ñga

⁹ Yac mba atac ñayham tu mac-ñga gêm yac mba ñalôm ahuc têtñ ndoc yac ateq mbec yêc yac neñ Anötö añgô-ñga. Yac atac whiñ ñandô bu anem danje iñ tu mac-ñga, madec oc akôm andic ñawaê. ¹⁰ Tôm acsalô ti ôbwêc yac ateq mbec ñañga, ma andac Anötö bu têtñ señ dan têtñ yac bu alic mac tiyham. Yac atac whiñ bu ateq mac aloc, ma awhê mac nem gauc sa tiyham pi Anötö ndê yom ñatô, bu apuc mac nem akêtñ whiñ dôn.

¹¹ Yac andac Damañ Anötö lu yac neñ Pômdau Yisu bu sêmasañ señ bu yac ateq mac aloc.

¹² Ma yac ateq mbec tu mac-ñga bocdec bu. Pômdau êmwasiñ mac e mac nem mêtê atac whiñ asidôwai sêkêtñ whiñ-ñga êñsôwec tiatu.

Ma mac atac whiŋ lau hoŋ bocdinaŋ, e mac nem mêtê atac whiŋ-ŋga êŋsalê mac ahuc, tôm yac atac whiŋ mac. ¹³ Ma iŋ puc mac nem ŋalôm dôŋ bu asa Anötö ndê lêŋ eŋ, e Pômdau Yisu mbu meŋ whiŋ iŋ ndê aŋela ti lau dabuŋ hoŋ. Bocdinaŋ têŋ ndoc mac alhac Damaŋ Anötö aŋgô-ŋga, naŋ iŋ oc lic mac bu lau dabuŋ ma mac nem giso mbasi.

4

Taŋkuc lêŋ naŋ Anötö tac whiŋ

¹ O asidôwai, yac mba yom ŋambu-ŋga têŋ mac bocdec. Lêŋ gitêŋ naŋ Anötö gêlic ŋayham, ma yac andôhôn têŋ mac su, naŋ mac akôm ambo. Ma kwahic dec yac bu atêŋ mac tu Pômdau Yisu ndê ŋaê-ŋga, bu asap lêŋ dau dôŋ ŋapaŋ, ma akôm tiatu-tiatu ndi. ² Bu yom hoŋ naŋ yac andôhôn têŋ mac am Pômdau Yisu aŋgô, naŋ mac aŋyalê su. ³ Ma lêŋ naŋ Anötö tac whiŋ, naŋ bocdec. Asa nem lêŋ solop e ati lau dabuŋ ŋandô. Ma andic ahê mêtê mockaiŋ-ŋga tidau-tidau. ⁴ Anötö kêmasaŋ lêŋ ŋayham ma dabuŋ bu awhê lu ŋgac sêmbo sêwhiŋ dau, dec mac lau tigeŋ-tigeŋ ayob daôm bu asa lêŋ dau ŋapep eŋ. ⁵ Yomandô! Akôm mêtê ŋalôm ŋagalac-ŋga tôm lau sambuc dom, bu ŋac sêŋyalê Anötö dom. ⁶ Ayob ŋapep bu mac nem daŋ kôm mêtê mockaiŋ-ŋga whiŋ asidôwa daŋ ndê awhê dom. Yac asôm asê ti akêŋ puc mac muŋ su, bu Pômdau oc kêŋ ŋagêyô têŋ lau pi sac kaiŋ dinaŋ hoŋ. ⁷ Aŋgô! Anötö kêgalêm yac sa bu dasa lêŋ ŋadômbwi dom. Mba! Iŋ kêgalêm yac sa

bu dasa lêng dabuŋ eŋ. ⁸ Yom dindec meŋ akêŋ Anötö, naŋ kêŋ ndê Nalau Dabuŋ sip mac nem ŋalôm. Bocdinaŋ asa naŋ sôc yom dau ŋapu dom, naŋ tec ŋamalac si yom dom, iŋ tec Anötö dau ndê yom bocdinaŋ.

⁹ Anötö dau kêdôhônŋ mac pi mêtê atac whiŋ asidôwai-ŋga, ma bocdinaŋ dec yac gauc gêm bu ato yom têtŋ mac pi mêtê dau dom. ¹⁰ Bu yac aŋyalê su bu mac atac whiŋ asidôwai sêkêŋ whiŋ-ŋga hoŋ naŋ sêndöc gameŋ Masedonia-ŋga. Kwahic dec yac bu asôm têtŋ mac bu asap mêtê dau dôŋ ŋapaŋ eŋ, ma akôm tiatu-tiatu ndi. ¹¹ Akêŋ nem gauc ti atac whiŋ sambuc bu asa nem lêng malô. Gauc nem gêtŋ naŋ gic mac ŋawaê solop, ma auŋ lau ŋatô si yom sa dom. Ma anem gwelenŋ bu akôm kwam daôm-ŋga, tôm yac asôm têtŋ mac su. ¹² Akôm bocdinaŋ bu akêŋ ŋawapac têtŋ lau ŋatô tu sênem mac sa-ŋga dom. Ma lau naŋ sêkêŋ whiŋ Yisu dom, naŋ oc sêlic mac nem mêtê dinaŋ, ma sêtoc mac nem lêng sa.

Lau batê oc sêtisa tiyham

¹³ O asidôwai, yac atac whiŋ bu awhê mac nem gauc sa pi lau naŋ sêmbac ndu su. Yac atec bu mac ataŋ daŋgibo atu tu ŋac-ŋga, gitôm lau naŋ sêkêŋ whiŋ Yisu dom, naŋ sêtaŋ. Lau dau sêtaŋ daŋgibo atu, ŋahu bu sêkêŋ bata bu lau batê oc sêtisa tiyham dom. ¹⁴ Tigenŋ yac dakêŋ whiŋ bu Yisu mbac ndu ma tisa tiyham, ma tu dinaŋ-ŋga dec yac dakêŋ whiŋ bu lau naŋ sêkêŋ whiŋ iŋ ma sêmbac ndu su, naŋ Anötö oc uŋ ŋac sa têtŋ ndoc Yisu mbu meŋ. ¹⁵ Pômdau dau sôm têtŋ yac, ma kwahic dec yac ahoc iŋ ndê yom asê têtŋ

mac bocdec bu. Têñ ndoc iñ mbu meñ, nañ iñ oc kôc yac lau nañ dambo tañli, nañ sa muñ dom. Iñ oc kôc lau nañ sêmbac ndu su, nañ sa muñ. ¹⁶ Anötö oc ndic atu yom ti ñaŋga, ma añela ñamata-ñga oc mbwêc awha atu, ma Anötö ndê dahuc oc tañ, goc Pômdau oc sip akêñ undambê meñ. Ma lau nañ sêkêñ whiñ Kìlisi ma sêmbac ndu su, nañ oc sêtisa sêmuñ. ¹⁷ Goc Anötö oc kôc yac lau nañ dambo tañli, nañ sa dapi lólôc dandi dawhiñ ñac, ma yac hoñ oc datap Pômdau sa yêc dao ñalôm. Ma yac oc dambo dawhiñ iñ ñapan eñ. ¹⁸ Bocdinañ, asôm yom dindec têt daôm, bu puc mac dôn ma ndic malô mac nem ñalôm.

5

Pômdau ndê bêc mbu meñ-ñga

¹⁻² O asidôwai. Mac anyalê su, bu bêc Pômdau mbu meñ-ñga nañ ñapuc mbasi, tôm ñgac kañ nañ sôc andu têt ôbwêc. Bocdinañ yac gauc gêm bu ato yom têt mac pi têt ti bêc dom. ³ Lau ñatô oc sêsôm yom bocdec bu, “Yac dambo têt ñayham ma ñawapac mba.” Ñac oc sêsôm yom kaiñ dinañ sêmbo, ma ñagahô eñ bêc ñambu-ñga dau oc meñ sa ma ñac oc sêñga. Lau dañ oc sêlhô su têt dinañ dom. Oc tôm awêhê tidaê nañ kêlhiñ dau siñ, magoc ñandê tu kôc balêkoc-ñga meñ sa iñ ñagahô ñambwa.

⁴ Magoc asidôwai, mac anyalê yom pi bêc ñambu-ñga dau su. Mac atôm lau nañ sêmbo ñasec ñalôm, nañ dom. Ma bocdinañ oc tôm dom bu bêc dau hôc asê mac gitôm ñgac kañ e kôm mac asô. ⁵ Bu mac ati balêkoc ñasec ti

ôbwêc-nga dom. Mac honj ati balêkoc nawê ti acsalô-nga. ⁶ Bocdinaŋ dambo datôm lau naŋ sêyêc bêc pu, naŋ dom. Mba! Dambo ti neŋ gauc nawa ma danem ali. ⁷ Bu lau naŋ sênôm bu naŋga e si gauc timboloc ma sêyêc bêc pu nawahô, naŋ lau nasec ti ôbwêc-nga. ⁸ Magoc yac lau nawê-nga, ma bocdinaŋ dambo ti neŋ gauc nawa. Mêtê dakêŋ whiŋ-nga ma atac whiŋ lau-nga, naŋ dasap dôŋ naŋga, gitôm ŋakwê siŋ-nga naŋ dasôc sac yac ŋabapo. Ma yac neŋ dakêŋ bataŋ Anötö ndê mwasin nem yac si-nga ŋa-ŋandô, naŋ gitôm gulun ain naŋ lau siŋ-nga sêun. ⁹ Bu Anötö kêyalin yac sa bu dahôc in ndê tac ŋandê dom. In kêyalin yac sa bu datap in ndê mwasin nem yac si-nga sa tu Pômdau Yisu Kilisi-nga. ¹⁰ Yisu mbac ndu tu yac-nga, ma bocdinaŋ yac bu dambac ndu me dambo taŋli têtŋ ndoc in mbu meŋ, naŋ taŋyalê bu yac oc dambo taŋli dawhiŋ in. ¹¹ Tu dinaŋ-nga asôm yom ŋayham-ŋayham têtŋ daôm, ma apuc daôm dôŋ bu alhac naŋga, tôm mac akôm ambo.

Yom ŋambu-nga

¹² O asidôwai. Yac bu andac mac bu atoc lau bata naŋ sêyob mac sem Pômdau aŋgô, naŋ sa ŋapep. Ŋac sêkôm gwelenj atu tu sênem mac sa-nga, ma sem la mac tu bu mac asap lêtŋ gitêtŋ dôŋ eŋ. ¹³ Boc-dinaŋ atoc ŋac sa ma atac whiŋ ŋac tu gwelenj atu naŋ sêkôm têtŋ mac-nga. Ma mac honj ambo awhiŋ daôm ti atac malô eŋ.

¹⁴ Asidôwai. Yac bu anem la mac bocdec bu. Akêŋ puc lau oyom bu sêndöc ŋambwa dom. Lau naŋ maya ti sêtöc dau, naŋ aŋgilí ŋac bu

sêlhac ñaŋga. Ma anem lau gauc babalê ma lau licwalô mba, naŋ sa. Akôc nem ñalôm dôŋ ma akôm mêtê malô têtŋ lau hoŋ. ¹⁵ Lau bu sêkôm sac têtŋ mac, naŋ dec mac hoŋ ayob daôm bu aô dom. Mac lau akêtŋ whiŋ-ŋga akôm mêtê ñayham eŋ têtŋ daôm, ma têtŋ lau hoŋ bocdinaŋ.

¹⁶ Tôm bêc hoŋ ambo ti atac ñayham. ¹⁷ Ma atetŋ mbec ñapaŋ. ¹⁸ Anem daŋge Anötö tu gêtŋ wapac me gêtŋ ñayham bocke naŋ tap mac sa-ŋga. Bu iŋ tac whiŋ bu mac lau naŋ akêtŋ whiŋ Yisu Kilisi, naŋ aŋkuc lêtŋ dinaŋ. ¹⁹ Ma asi Ñalau Dabuŋ ndê ya ndu dom. ²⁰ Iŋ bu kac lau ñatô bu sêhoc yom asê gitôm propet, naŋ dec apu ñac si yom dom. ²¹ Aŋsahê gêtŋ hoŋ, ma asap ñayham dôŋ. ²² Ma andic ahê mêtê sac-sac hoŋ.

²³ Yac atetŋ mbec tu mac-ŋga bocdec bu. Anötö Yom Malô Ñadau ndic dabiŋ mac ati lau dabuŋ solop. Ma bocdinaŋ têtŋ bêc naŋ Pômdau Yisu Kilisi mbu meŋ, naŋ Anötö oc tap sa bu mac nem giso mbasi, ma lic mac nem gatôm ti nem ñalôm ma ñamlic sambuc bu dabuŋ. ²⁴ Yac akêtŋ whiŋ bu Anötö, naŋ kêgalêm mac sa, naŋ oc ñgô yac mba mbec ma kôm ñandô sa.

²⁵ O asidôwai, atetŋ mbec tu yac-ŋga. ²⁶ Ma akam asidôwai hoŋ anem yac aŋôtŋ tu Pômdau Yisu-ŋga. ²⁷ Yêc Pômdau aŋgô-ŋga, aô wandac mac bu asam bapia dindéc têtŋ asidôwai hoŋ naŋ sêmbo mac nem gameŋ. ²⁸ Pômdau Yisu Kilisi ndê mwasiŋ têtŋ mac hoŋ.

Anötö ndê Yom Lêñsêm Wakuc
Bugawac: Anötö ndê Yom Lêñsêm Wakuc New
Testament

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Feb 2024 from source
files dated 29 Jan 2022

1dcc5a6c-3c1e-54e8-aa77-af18a3782048